

四庫全書

集部

欽定四庫全書

集部

虛舟集卷二

詳校官國子監司業_臣納麟寶

中書_臣劉源溥覆勘

總校官原任_臣王燕緒

校對官中書_臣康儀鈞

謄錄監生_臣戈廷樸

欽定四庫全書

集部六

虛舟集

別集類五明

提要

臣等謹案虛舟集五卷明王偁撰偁字孟揚永福人元潮州總管翰之子翰于明初抗節死偁生甫六齡其母教之讀書以弱冠領鄉薦乞歸養母成祖即位徵至京師授國史院檢討充永樂大典副總裁坐解縉黨下獄死

為諸體詩共五卷前有王汝玉序又有解縉
序二首一題虛舟集一題其文集而弘治六
年桑懌序則為袁州守王世英翻刻虛舟集
而作不言其別有文集蓋當時已失傳矣集
末附續書評及自述誄各一首偁與解縉友
善其才氣學問約略相似故縉亦極推許之
卒同被讒譖以死然縉詩頗傷剽直若偁之
恬和安雅殆為勝之自述稱服羣聖獵百家

窮幽明每遇登高弔古慨然發其悲壯愉樂
一寓于文若詩其命意亦殊不苟故集中若
感寓諸作規撫拾遺詠史數篇步趨記室將
進酒行路難等亦頗出入于太白歌行雖未
必盡合古人而一鱗半爪隱現雲端固不止
于衣冠優孟也乾隆四十四年八月恭校上

總纂官

臣

紀昀

臣

陸錫熊

臣

孫士毅

臣

費

墀

總校官

臣

陸

臣

費

臣

墀

臣

費

墀

虛舟集原序

立言豈易哉况聲成文之謂詩詩又言之精者揚子
雲曰雕蟲小技壯夫不為誠知言也是故必有超逸絕
倫之姿雄渾浩博之氣精深明徹之見源委淵懿之學
然後可以挾風騷之體備衆論之長出而鳴一代之盛
焉斯豈易易哉三百篇尚矣漢魏以降迄於宋元其間
聲律之變雖有不齊而卓然成家者莫不由是不由是
者不足以傳之遠也若夫翰林王孟揚者信乎可以繼

前人之風相與角立於百代之下者乎孟揚之詩其趣
高其調逸其詞雄其學富出入漢魏盛唐不為近代之
語真傑作也抑何由而致是哉余聞培之深者發之茂
積之廣者出之沛蓋孟揚幼生閩粵間負英邁之姿席
先世之澤閉門讀書逾二十年又閩多君子孟揚得師
友之助其所資所養者豐矣比其出遊也觀濤於浙江
弔禹功於震澤入京師見都城之雄偉宮闕之壯麗府
庫之充實九夷八蠻之會同官翰林耳目所接莫非朝

廷之典章一代之制作政教所布號令所施或或乎且
得屢預國家大事入侍講筵身親禮文之盛及奉命親
藩泛洞庭留長沙探古蹟於名山川又浮沅湘歷九疑
從大將軍觀兵交趾極於南表胸中亦汪洋浩博矣宜
其吐為辭章超卓凌轢不自知也昔司馬子長生龍門
講道齊魯之鄉東上會稽探禹穴北適燕趙與其豪俊
子弟交遊故其文雄深雅健跌宕不羈孰謂孟揚之於
詩不由是歟雖然士生幸遇光嶽之氣全則其發於言

者敦實渾龐得性情之正予老而無能為矣繼清廟生
民之什以鳴國家之隆者非孟揚誰望焉俾叙其集於
是乎書永樂辛卯歲孟春左春坊右贊善兼翰林院編
脩前脩國史吳下王汝玉序

永樂初勅脩金匱石室之書繼是復有大典之命內外
儒臣及四方韋布士集闕下者數千人求其博洽幽明
洞貫今古學博而思深如吾太史三山王君孟揚者不
一二見然孟揚之為人眼空四海壁立千仞視餘子瑣

瑣者不啻卧之地下以是名雖日彰謗亦隨之余每擬
薦自代不果且孟揚視功名泊如每有抗浮雲之志期
在息機與物無競故其集以虛舟名亦可見其志焉余
且第其人品當在蘇長公之列文之奇偉浩瀚亦類至
於詩則凌駕漢唐使眉山見之未必不擊節嘆賞思避
竈而煬此余之論孟揚者如是他人未必知也孟揚在
翰林越三年不欲示其長於人然一遇知己與論古今
成敗人物賢否政事得失治道升降則目如曙光辨如

懸河真若超千古而立於獨者孟揚固不欲專以文名
越石父有言士絀於不知已而伸於知己余其有負於
孟揚哉余其有負於孟揚哉握手都門出其集徵予言
遂敬書以復之永樂丁亥春翰林院學士兼春坊大學
士國史總裁廬陵解縉書

天之文地之文人文與生俱生者也皇太昊之作書契
畫竒耦名乾坤別坎離文字著矣黃帝帝放顓帝重華
君臣擴而充之爾至素王大備焉六經卓矣後千百年

太史遷昌黎伯歐陽公有以窺其蘊於是文人之文作
焉當其時漢則揚雄班固和之唐柳宗元李翱皇甫湜
和之宋蘇軾曾鞏和之繼斯文之作倡以和者夫豈無
其人乎今孟揚王君之作其庶幾乎君靈武之世家也
其先君守湖州死義於勝國母夫人守節自誓教之其
外大父秘書公尤博學知名當時君皆不及事之自知
讀書為文兩家善慶所鍾也君生於閩弱冠舉進士來
京師陳情歸養太祖高皇帝憐而許之退而家居定省

之暇扁舟載月左右圖書從遊者數人淪清泉而剝丹
荔也人望之如在天表其視區區世俗之淺者為何如
哉聖天子龍飛初求斯文之瓌傑近臣爭言君使使聘
之至待以殊禮坐之黃閣之下日傳其議衣冠甚偉衆
見皆靡又輒自陳願退學校以宏斯文之化即日有詔
擢國史院檢討以布衣授是官異數也而君逡巡其間
如在高帝時由其文章足以自娛得乎內者重而待於
外者輕自期者甚遠而於斯文亦莫能窺其所至也蓋

其新足以濯天下之陳腐其雄足以振末流之頽靡其
清足以汰奕世之污濁其密也足以通羣聖之蘊奧貫
而一之也洗沃日月若引江海而上之挽河漢而下之
霖雨九土也浩乎養氣之盛析理之精充乎宇宙而洽
幽明包乎六合之外也其可以世俗之淺淺者觀之哉
其可以世俗之淺淺者觀之哉其真有見於素王之卓
爾而欲罷不能者歟翰林學士兼左春坊大學士國史
總裁廬陵解縉書

重刊虛舟集序

閩之三山世英王先生初為名進士入翰林為庶吉士授地官主事擢副郎出守袁州以文章學行發為政事其豈弟有循吏之風威重得大臣之體公暇尤留心文事慨其鄉有王君孟揚素以文名當世欲翻刻其虛舟集而乞予言以弁諸首予觀孟揚之文上有續書評其文如宜僚弄丸左之而右右之而左皆縱橫如志至如西域神馬過都歷塊微有躑躅之感怨而不怒信能言

士哉孟揚在當時名聲藉甚早擢巍科為翰林院檢討
入侍經筵及總裁永樂大典同大將軍英國公觀兵交
趾而歸竟以非辜囚繫而死夫謗之與譽相為倚伏觀
吳下王君汝玉評孟揚詩入陳拾遺李謫仙堂室廬陵
解君縉謂其詩凌駕漢唐使眉山見之當避竈而煬準
二子之所言則當時盛譽可知其譽如山則其謗如海
孟揚生死榮辱所繫如此且言欲其立不必出諸口行
欲其修不必踐諸身此則天下大同之世淳風之散久

矣相異則忌相忌則嫉嫉之之深則無所不至焉士君子易處世哉締觀古人逃智以愚去慎為狂以長嘆而了萬變託沈酣以冥萬象雖皆失乎中行原其欲藉是以免世情或可恕也如范滂阮籍之流不失為狂狷之士有道之世成就之拂拭之當有一割之用或退處丘壑友務光而拉文伯亦足成其名於後世何至舉世無所依範任其性之所至而為一偏之歸況使之不得其死耶孟揚臨終有自誄詞一篇與陶淵明秦少游自挽

詩意同得陶之曠達兼秦之悽愴讀之至今使人淚下而不禁昔之置孟揚於死地者今復何在徒足以來千古之唾罵果有賢守如先生者為表章其言以傳不朽者乎君子觀此則知欲有所立不可畏世而不修而世之欲擠君子者計其必馨香於後世凡不究其用與夫不安其生者皆足以為治代治化之累而已之罪恒不原則亦可以少戒以成身與世之美者矣孟揚父友石山人仕元為總管國朝死節先生并刻其詩亦屬予為

之序弘治六年重陽前二日柳州府通判思玄居士東
吳桑悅民懌書

欽定四庫全書

虛舟集卷一

明 王偁 撰

五言古詩

感寓

吾聞上古初渾灝本一氣義皇肇人文龍馬颯已至軒
鴻垂衣紳唐虞臻至治有巢邈以遠黼黻日云貴自從
蒼姬還玄酒薄真味鳳衰其如何寥落匪一世

其二

雙精激飛輪循虛節驚至逝川無迴波千秋倏如駛浮
生日及榮孰與喬松齒君看邛山墳累累正相似鵲鳴
羣芳歇大暮同歸矣誰知清濁間中有恒不死

其三

圓魄載陽燄終古無虧盈因人示肫肫側見死與生蟾
蜍薄陰采顧兔潛其形何當凌倒景一覩天地精

其四

璇穹垂至象衆曜何煌煌能符調庶極帝車幹陰陽晝
夜無停機所職各有章蒼精奉東壁神虎屯西央淵淵
北辰尊穆爾居其方司契古有成無為位彌昌

其五

素琴絙朱絃中有流水音連城為之彈太息發哀吟仙
人空中來鸞鶴翔幽岑斯意不可述江漢清且深

其六

中空發駕辯清聲間陵阿鄭客一在坐自以延露和至

音久寥寂空靡世共歌俚耳不可尚竿瑟將奈何

其七

驅車首陽下望古懷清芬斯人久已化令名今尚存讓
國就倫命殺身以成仁如何有千駟寂寞身無聞

其八

端居閱元文云是古苔編中有羽化術煉服可延年中
夜養玄牝積虛成自然朝餐沆瀣糧夕飲玉醴泉東邀
青童君西揖金母前笑攀若木枝頻見昆吾顛茲事苟

不繆吾將命求旃

其九

真人趣恬澹漠爾中若浮無心亦無為日與至道游羣
生接為構水火鬪不休軒轅赤水珠須以象罔求寥寥
六合間可以命虛舟

其十

太白夜食昴流輝燭天街精感動穹漢君心寧見懷白
壁忌暗投徒使按劍猜所以狂接輿鳳歌歸去來

十一

玄穹貯幽默至理何寥寥良竊潛一機迴薄如旋飈嫵
嫵孰妍媸殤眚詎遘遼張生既中廢單子亦外彫所以
塞北翁頗識理亂條云胡徇物者汲汲徒內焦咄哉感
吾衷長歌且行謠

十二

龍虎啟晉伯熊羆兆齊封豺聲餒教鬼牛禍成庚宗廢
興自古來吾將訊其蒙蒼昊本何心至理元冲冲

十三

嬴皇魘威武漢帝非仙才玄關祕靈府何處求蓬萊終
遺鎬池壁空獻新垣杯但見三泉下寶衣變寒灰

十四

大庭昔酣醉遺此釣天章遂令鵷首墟虎視吞八荒嬴
基苦莫敦所恃逾兇狂詭命終見奪百二空蒼涼

十五

金行昔馳馭邊馬窺神州譎張厭神鬼狂恣輕王侯蹴

踏五都裂穢濁三精收上天實禍淫所佑在祥休豈伊
否泰運一氣恒相道經過覽故墟落日黃雲浮冥穹不
可訊涇渭方安流

十六

商君挾三術西遊詫秦君上陳帝王畧邈已寧見珍陽
春信寡和下里迺得親孔轍七十週信哉無停輪我有
縈絃思區區向誰陳

十七

番番南昌尉不知名位卑上書抱區區忠懇何由知靈
鳥鳴朝陽莫為世所希終然吳門市散髮招鵝夷

十八

蚩尤卓長空漢兵出陰朔材官三十萬旌甲蔽墟落長
驅破輶輶萬里靖寥廓朔南無王庭功成衛與霍誰知
青塞月白骨照沙漠

十九

元精格至理寂感通幽明造化雖甚微焉能外吾形飛

霜激齊臺振風揚楚庭庶賤尚復爾況與至道并聖功
極中和二儀為清寧緬彼歸昌音何時復來吟

二十

秋風肅萬物嚴霜下空庭不惜百草晚惜此蘭蕙傾祥
麟一朝羈尼父為涕零大運固莫測聖哲那能營容成
安往哉遠跡良冥冥

二十一

艷色不足貴所貴在適時昭君傾國容遂為丹青欺蛾

眉嫁絕域一往不可追至今青塚月夜夜令人悲

二十二

玉麗不盈把德輝照四隣段生日偃卧迺能蕃衛君澆
風薄士節自碎明月珍求蟬貴明火俛仰懷古人

二十三

闕居嬰世媒局束無安步石火流狂飈憂來鬢成素誓
言濯吾纓釋此出門去臨流弄滄浪升丘引遐顧仰羨
雙飛鴻肅肅在雲路

二十四

蘭以薌見楚膏以明自剪高才信非美賢智成禍愆龔
生蹈偉節楚老有遺言清風雖可希惜哉天天年

二十五

直木忌先伐甘井忌先竭何為抱區區昭如揭日月至
人善閉闕埋照慎不發入獸不亂羣虛舟任超越襄墜
迷帝軒汾陽枉堯轍棲心玄靈臺可與人世絕

二十六

春至百卉生感我池上情折芳玩新綠臨風為誰榮
念樹合歡忘憂樹萱草念蠲憂亦忘希夷自為寶

二十七

幽居玩羣生小大俱物役嗟嗟羽族微擾擾亦何極
鷗鷺共聯羽精衛勞木石何如三青禽翹尾戴勝側

二十八

庖丁擅操割目行神為虛三年無全牛投刃劃有餘淵
情妙至理豈受外物拘冥筌苟不棄安能得神珠

二十九

凌晨採琅玕，沂彼洛水涯。
脩然有神遇，綽約間令姿。
投我以珮環，却致交甫辭。
艷色豈不姣，贈賂良亦稀。
但恐結縭好，中道有所虧。

三十

天天園中桃灼灼，映綺窻窻中有織婦顏色。
如青陽三年弄機杼，七襄成報章成章欲何為。
願以充君裳，但恐不見察徘徊空感傷。

三十一

繇條蘊徂謝清宮
媒炎寒涇陽擅秦寵
豈得常交歡一朝成
遠間斂怨東出關
昔日天桃花今同秋
草殘所以龍陽魚
痛哉涕汎瀾

三十二

富貴千里合貧賤
促膝離骨肉尚云爾
何況他人為不覩
寶門士請看蘭庭
綦翟公何為者謝
客無乃遲

三十三

金
卷一
祈龍敏辯給惠施夸便僂竹書信激詭堅白方自賢騰
口徒見尤胡能事幽玄九州誰復徵多方亦已然去矣
桃李蹊予將欲忘言

三十四

翩翩遊俠子出入咸陽城千金買意氣五陵交弟兄袖
中徐匕首拂拭秋霜明十步殺一人千里不留行世人
矜勇智中貴聯芳聲末路賤行檢此輩方縱橫至今季
布死尚識朱家名

三十五

拂檻引菱荷當風和激楚皓齒揚修蛾清尊閒芳俎三
川美少年五陵游俠子取樂不知疲但畏韶光阻焉知
董生惟妙心在千古

三十六

我有太阿劍龍文翠奇章精光動星斗揮霍迴陰陽淬
以金鵬鶚衣之古盤囊夜深雷雨驚恐逐風雲翔剛明
易點缺貴能斂其銍用之如發矟保之在深藏去去勿

復道相期霄漢長

三十七

齧膝志萬里蘭筋何權奇長鳴一見馭蹀躞遺風追伯
樂苟不值曠世誰能知離離玉山禾曷慰渴與饑八龍
眇何許宛足長相隨

三十八

東園桃李樹灼灼春妍華佳人不再摘芳意其如何白
日每不退流光竟蹉跎大運苦難遇感此哀情多

三十九

孤鳳久不食所志金琅玕喧呼百鳥中東翮斂羽翰會
當覽德輝飛下青雲端虞廷方見待阿閣當空盤誰令
抱威儀局促風雲間

四十

宋人得燕石自謂璫與珎徒勞什襲重見哂周大夫流
俗久繆誤美價恒異沽所以卞和子抱璞空長吁

四十一

公軒處懿鶴白屋譏千秋
菜蔬盈高閣申椒掩荒陬
頽東方生虛為歲星遊
方將猿鶴化豈為沙蟲謀
歸從紫泥海再弄青淺流

四十二

照影莫唾井種葵莫傷根
傷根葵不生唾井隳明神樂
生北去趙由余西霸秦壯士
感知已鄙人懷私恩止止
且勿哀千秋黃金臺

四十三

昏壁中始見烈風號北林飄飄遠遊子中夜抱單琴
音激楚奏清商悲越吟豈茲異鄉感兼之年歲侵胡為
苦行役薄暮猶駸駸

四十四

四時有代謝千古誰成功昔時東陵侯今日瓜田中
雄劍且勿悲飄順天地同武安豈不偉掩關終何庸

四十五

桂樹生高嶺揚芬散天風濯濯甘露滋泠泠被芳叢
託

根既得所衆卉羞與同幽蘭獨何為顛顚荆棘中

四十六

楚夫重鵠夷詫作丹穴翹鸚飛東南至文羽不見邀一
鳴旭日升再弄律呂調簫臺有練實去去翔遐霄

四十七

世人競功利志得靡暫寧邴生事薄遊匆匆懷蘭馨游
心不滯物泛若浮雲輕豈徒漆園傲百世同高情

四十八

微禽變淮海流光遷驚湍人生豈不化徒結千載歡昔
為金虎臺今見荆棘攢碧海不可蹈紫闕邈難攀誰邀
大丙馭去覓無窮山

君子行

君子勵苦節恒在造次間造次苟不念履霜成冰堅邪
蒿豈不美惡木豈不繁雖勞亦不息雖飢亦不餐顧此
風尚乖濁涇溷清瀾勝母里不入朝歌邑還轅往哲有
明戒君子防未然

長安有狹斜

長安有狹斜車馬相馳驅被服紈與素賓從閒且都金
章何煌煌旄節照四衢借問從何來云自許史廬炙手
手可熱炎涼在吹噓豈無範驅子亦有步矩儒一身困
蓬藜終歲空嘯嘯秉躬信如矢不悟世道迂在昔弦與
鈎封侯死道隅寧知此狹斜徑捷良可趨微生頗有尚
風志誓不渝念無此容顏策蹇旋吾車

野田黃雀行

黃雀何翩翩羣飛野田側飛鳥自相呼飲啄仍共適誰
知遊俠子張丸事彈射腥驅薦鼎俎腐壤委毛翮微物
何足甄感念在疇昔蔡侯富遊盤行樂方未極安知子
發至一旦殞其國至哉莊辛談可以長太息不覩黃雀
哀千秋復何益

結客少年場

玉勒驕驕寶刀耀星芒相逢鬪雞里結客少年場探
丸殺公吏白日醉咸陽司隸不敢捕意氣凌秋霜一朝

許報國投驅赴邊疆
蹀躞匈奴庭萬人不敢當
彎弓射月支斬首得賢王
歸來不受賞出入金殿旁
輕脫李布死却哂鼎政
狂鄙哉汗陽石不使俠傳芳

今日良宴會

三川富豪雄濟濟美少年
驩遊及芳歲鞍馬何翩翩
秦箏奏新聲妙舞妖且妍
今日良宴會意氣如雲煙
人生若朝榮灼灼寧久鮮
無為坐坎壈流光悲逝川

置酒高堂上

置酒高堂上豐廚出鮮肥廣筵羅衆賓清尊間蛾眉羽
觴若流星絲竹清且悲陽阿屢迴雪激楚超蘭猗畫盡
繼以燭取樂良未涯流連豈不荒所慎白日移一朝委
山丘琴瑟將奚為嗟彼蟋蟀詩無為世所嗤

車遥遥

車輪何遥遥西上長安道不見車中人空悲道傍草君
行日已遠恩愛難自保憂來當何如一夕夢顛倒豈無
中山酒一浣我懷抱但恐三春華顏色不再好車聲何

卷一
紛紛風吹馬蹄塵願隨馬蹄塵飛逐君車輪

苦別離

瑤瑟對玉卮中有千萬思欲彈再三嘆多是苦別離妾
顏如秋華零落方在茲君心如逝水一去無迴時皎皎
雲間月幾見圓復缺月缺有圓時君胡苦別離

步虛詞

東華青陽君授我寶篆文六角梁星芒讀之了不分謂
之蕊珠篇玉檢得空云持此可度世出入齊化鈞再拜

服至言歸來嗽芳芬火粒一排棄永此偕仙真

其二

卿雲爛冲霄祥景啟大羅紫微穆虛皇太清為我家
鏘八琅璈和以希夷歌一氣但浮衍至道良不頗頗觀
區中緣蜉蝣競春華天濁不自愛真意其如何

其三

精心仰真範稽首朝玄都祥氛結靈宇雙闕浮太虛離
羅古仙人羽駕紛來趨冥言感至理道化超羣無口吟

金少卿公集 卷一
三洞章身佩五嶽圖真詮諒斯在邈矣浩劫初

其四

瓊臺瑤圃西弱水扶桑東
颺輪歛上征八龍儼來從
整佩訪金母弭節朝玉童
津津九霞觴粲粲方諸宮
授以至道言所濟良無窮
却馭俯倒景八表空冥濛

從軍行

投筆出虎觀從軍事龍韜
平生弧矢志誰慙五陵豪
大江天宇晴平明集千艘
組練照雲日戎師候旌旄
一笑

挽弓胎三杯拂豪曹酒酣意氣重萬事輕鴻毛袖中黃
石編可與烈士高

又

上將躬受脰鉄鉞專南征熊羆百萬師長驅下青冥五
嶺息瘴癘三邊警威靈指揮動星漢嘯咤生風霆洗兵
當載橐斬馘期弗爭上以立國威下以甦民生周詩有
遺什敢不滋令名

遊仙曲為張真人羽化而作

祥雲凝素華初景麗璇霄羽駕集萬靈上下何飄飄要
眇笙鶴音和以空仙謠塵緣一洗脫頓覺神形超下士
盼末光長跪不可召回颺灑而至矯首空雲翹

其二

剛颺載飛軒上泝無始鄉心冥一氣表坐斷萬劫場茲
來食色身緬邈情俱忘長歌禽雲璈朗詠流玉章空明
結真無晝夜何煌煌嗟哉下土家仰止徒悲傷

其三

晞髮九陽城濯足咸池津松喬相邂逅翼我登飈輪金
天謁西母紫府朝玉真朝遊扳曜羅夕憩邇結璘空同
仰真梵愚濁慙下民因之一緘札稽首黃麒麟

其四

化機無停輪萬有互始終至人出陶鈞與道相無窮大
庭儼羣仙羽蓋時來從逍遙玉虛境一無每自同真詮
久云遼至理標鴻濛何時復降世清都振玄風

詠史

金史卷一百一十五
卷一
達人志莫測變化猶鵬鷖倏忽翔九萬虞羅空見存莊
生揮楚璧仲連却秦軍峻武薄層漢高情寄浮雲昔過
聊城側復經濮水漬餘風尚不泯肅肅來清芬

其二

狐白僅一腋勝彼千羊皮壯士出片言萬諾空奚為毛
生逢平原自脫囊中錐提携十九人咤彼猶嬰兒一語
定從盟不待日昃時英風被廣座磊落誠可奇知人豈
不難長鈇聲同悲

其三

大夫一言合不論故與新傾蓋即相許白首如路入夕
為牛下士旦作座上賓吐論即見收揚芳及後塵豈無
私嬖讒不能間其親虞卿起相趙五羖西入秦一旦魚
水歡舉屬疏賤臣志士慕知己臨風一馳神

其四

讒言信固極構亂成禍媒不有明哲鑒誰能知是非青
蠅一朝集白璧成瑕疵姬丈不見明宋墨名為隳賢聖

尚云爾耿耿將誰為爍金不待燃毀骨痛莫追空懷素
絲志寧却貝錦詩白圭懷魏珠季子食駸膠漆苟有
契誰能為別離

其五

芝蘭生中林寂寞翳荆杞豈不擅芬芳乃與茆蕪齒丈
夫昔未遇憔悴亦如此范睢快仇敵蘇秦笑妻子淮陰
出胯下相如困泥滓悠悠世俗態落落誰知己

其六

成役赴關隴馳車經洛陽羣公翕雲集節鉞何輝煌炎
精啟初輝云定神鼎方顧瞻瀍澗瀕山川蔚蒼蒼脫輓
棄道左躡履整敝裳叩軍陳便宜炯目如曙光析此利
害端吐論何軒昂咸秦古天府百二誠帝疆丈夫鏡時
機識此理亂章一語棄貧賤笑談綰銀黃此儒竟何為
空守蓬蓼場

其七

賈生洛陽人年少有遠識當其痛哭時漢祚如磐石其

言非實狂四座為動色抱火厝積薪寢食方自得長沙
卑暑地自古舞鯤窄吞舟詎能容驥足誠窘迫弔湘見
微志感鵬成太息道大古莫容夫子亦何極駑駘服上
裏駟駟棄道側卓哉治安書遺耀在簡冊

其八

昔人有奇策折衝尊俎間何必百萬師出入無時閒司
成久不作晏嬰邈難攀廟勝久已非徒興聖父嘆莫酬
突徙薪賞及焦面顏神功貴無迹此道良獨難

其九

三卿譏世及孔華粲若星尾大恒不掉拊枝攀根榮火
光儵中微五豎並列庭禁兵設蘭錡金彰貂長纓私門
填萬軌指顧山嶽平龜鼎潛欲移擁弱徒虛名豈無賢
智謀發言炳中誠根蟠固已久大運終就傾

其十

彭薛志已卓貢公榮未遺二邨近止足兩疏明見幾朗
識洞在初何勞張械機功成有代謝四序恒推移狂瀾

方橫流六合飄驚颶天損不我加至樂同希夷

十一

鳳躍難為枝龍潛難為淵驥足不一展百里枉大賢士
元困已委文舉類左遷苟足知己明虛為世所捐劍埋
風胡悲璞殞卞氏僞黃鐘雜瓦缶舉世方復然

十二

翩翩城隅雀所產得鷓鴣孰云小可臣殷祀乃忽而正
祥不足恃昏狂禍之基番番老黃冠出語驚耄期嗟哉

倪侯館得死乃所宜

虛舟集卷一

欽定四庫全書

虛舟集卷二

明 王偁 撰

五言古詩

遊小雄澗壑有成

陰鳥變殘雪流新吐溶溶偶尋一徑微獨與採樵同兩
崖濕花霧衆竅吟天風雲根濯苔髮亂篠相冥濛盤崑
折磴道似各冥搜窮石門忽中斷曠望開烟叢蘿雨澤

金少日人卷二
毛髮松枯清心胸了然青洲霞照影寒潭空始知人境
外別有仙源通振鷁揮片雲投情依遠鴻玄棲極要眇
神遊小崆峒真仙金鵝蕊一室丹火紅勅授紫囊訣永
期變鶴蹤却憶望城市白日氛埃中

尋小雄仙崑二龍潭值風雨歸草堂作

昔人洗玉髓幽洞驅龍耕丹成輟瑤耒成此秋水泓飛
厓夾兩鏡洞見雲霞生百鬼不敢啼雌雄常夜鳴有時
湍瀨寒幾曲流瓊英清秋墮蟾影白日聞雷聲偶茲訪

靈竒掃石窺清泠洗心盟鷗鷺濯髮解冠纓長風動懸
羅颯爽毛骨驚飛雨洒而至萬壑秋冥冥歸途檉桂影
了了心目醒到家興未已石室披丹經

登劣剎峯宿湧泉寺得仍字

翠微白雲裏逢秋思一登聳身躡雲壁飛泉搖古藤洞
豁海天際坐見萬景澄飲澗動羣鹿宴林逢真僧邀我
宿化城珠林懸古燈寥寥片月上悄悄天籟凝因悲向
城市塵髮秋相仍

水亭夜懷黃八聚林六敏

孤亭水雲深
人境自幽絕
七絃罷鳴彈
桐陰初上月
偶酌尊中醪
高卧望雲闕
荷露清角巾
松飈濯毛髮
寥寥天籟寒
吟咏了未輟
志偕南阜隱
興藉東山發
同心念離居中坐
思超忽

入西山訪張隱士

兩涯噴飛瀑
結屋烟蘿裡
山人不冠履
客至同隱几
獨鶴海上歸
孤雲澗中起
淨掃白石牀
風來墮松子

晚至石潭遇孤鶴懷仙

洞口拾瑤草石流正淙淙尋源信輕策一徑披鴻濛攀
緣雜花鳥亂聒松桂風石牀留片雲玉鏡莓苔空少焉
羣壑靜落景明西峯獨鶴何處來舞影寒潭中因之想
長馭乘化入無窮

遊清源別後寄溫陵田處士

夙性慕玄賞少年復離羣囊書不得意菽水懷親恩請
纓卑任俠點筆徒工文腰間脫寶劍歸卧清溪雲擢歌

有時閒放浪滄海瀆雲水秀孤島石壁澄霞紋茸茸紫
藤花濯濯敷泉根鶴影波上歸龍吟水中聞興來拂瑤
軫蘭情灑餘芬曲罷劃長嘯衆籟清衣巾夫子弄玉簫
邀予醉瓊尊紅泉看洗藥碧澗思垂綸區緣一以說恍
若超埃氛別後緬靈境中夜飛吟魂昨夢紫峯岑月色
何紛紛清光阻天末眇懷猶為君拒我手中策拂我衣
上塵明當營丹砂去與壺公隣

晚至囊山寺

蒼山入踈烟狀若土囊決振衣秋磬鐘投烏化城月天
吟動風籟霞想陋雲闕沉沉慧燈影了了見毛髮余生
值多故所性慕禪悅偶偕真僧期始若妄緣絕冥心依
覺場度世賴慈筏誰能量虛空澹爾離言說

自牧居士與玉壺道人古囊善復二師共結三生
之社書來與余論老釋二師遂用畬之

觀空泯羣有崇虛悟真玄微言掃煩障妙契排冥筌况
之憩遠跡邈在雲蘿顛空香入人境花雨來諸天三緣

金一八
卷二
一
等無生衆妙同自然喻心了無取濯濯如清蓮襄城除
害馬祇舍留真銓願君解明月示我造劫前

遊清源山道院

仙人有奇觀鷄犬白雲裡春至桃花開千枝映流水星
壇藥草青夜空丹光紫天上期鶴笙人間識鳥履伊余
倦俗流千載困泥滓久矣期大還乘風一來此金書啟
真秘石洞洗玄髓河車信可營心期羨門子

登薛仙峰寄自牧知已

小年學劍術，穎脫神鋒生。身嫻韜畧，書吐論吞橫。傍
搜百家言，復得夷鞅情。自顧萬人豪，不慙一代英。擔簦
赴神州，十上空無成。巍巍黃金臺，邀哉阻天庭。歸來守
故墟，索寞羅秋螢。作書謝知己，閉門絕浮榮。悄悄林下
居，一室有餘清。閒尋白社約，或作青山行。傲吏期解冠，
漁父同濯纓。縱酒竹林逸，尋仙松子盟。匣中雙寶器，棄
置蛟龍鳴。偶茲凌丹梯，足下雲霞昇。孤鴻天外出，白日
波上明。九節菖蒲花，採掇延吾齡。飄飄羽人居，蛻骨遺

玄經吸景若可弄丹砂思一營惟君抱孤絕襟懷洞春
冰相期苟有志雲鴻極冥冥

與鳴秋趙山人夜宿山居述懷有贈

塵居厭湫隘抗節慕遠遊道逢佳喬侶假以雙翠虬周
覽六合虛閭風不可留茲山富形勝歸來事玄謀紉蘭
理初服飲水期前修芳盟及歲晚世事輕雲浮伊人負
奇抱泛若乘虛舟斂跡三十年不應當世求高齋探玄
默衆妙窮冥搜有時發逸興登臨眺高秋鳴奕送天籟

酌酒環清流，朝尋蘿谷曉。暝期蓮社幽，布衾清夜闌。
欸語相綢繆，冲懷薄華組。心跡同悠悠，青楓落遠磧。
芳蘭蔽層丘，眇彼天際雲。非君誰與傳。

送陳貢士

陳生江海士，跼蹐當豪門。五侯少知己，倚劍思平原。
海國一相訪，別余歸故園。杯銜霜夜月，袂拂秋山雲。
四望大野空，蕭蕭鳴鴈羣。意氣但自許，離懷何足論。

送黃紀事濟

寶劍雙轆轤，鍰吐青芙蓉。臨歧一脫贈，恍若騰蛟龍。君
行感我懷，起視雲海空。百年閱幻境，萬里吹飛蓬。登天
覽餘暉，孰挽濛汜東。詩書古有立，貧賤道何窮。常希日
月私，獨負雨露功。長卿卧茂陵，不為世所容。季子黑貂
敝，當年怨秋風。泥塗困布衣，渭水悲釣翁。山松落澗草，
海鶴羞樊籠。大運自古來，俛仰那能終。感茲不成歡，別
去何匆匆。城南登高丘，眺遠情所鍾。一水瀉寒練，斷雲
引歸鴻。中座擊筑心，醉吟氣頗雄。興落遠天碧，思染秋

山紅睽離自茲始夢繞青林楓

存耕堂

原田積茶堇莆田秀驕驕何如方寸間濯濯敷靈苗內
顧無町畦孰能辨肥磽蟲賊莫我害旱暵莫我焦但願
保良稼毋令崇艾蕭

悅心齋

稟化凝正氣虛靈淡無為鑿鑿方寸間熒熒啟天機匪
伊芻豢甘不假文繡資一理苟不昧為善咸足怡雍雍

樂道園蕩蕩崇德基往哲有遺訓服膺諒無違

守默

礪石鼓天讒教客司南箕昭茲捲舌戒可喻緘口辭無
言希聖謨守中當我師誰知淵默中成貸良在茲

其二

哲人守樞機所慎在禍門存心堅玉鑰內顧乃靜專金
人垂往訓白圭有遺編三復諒不忘令名當與全

其三

便便夸毗子辯口相矜欺寧知起羞訓悖出來亦違一
朝捫舌悔四馬曠莫追我思磨甿堅千載猶須斯

其四

躁妄伐天性幽元養明神如何嗇夫雄喋喋忘苦辛辯
鉅恒若訥辭多非吉人君看桃李花無為禍所隣

素齋

大樸斲已久斯人抱冲襟寥寥一室間坐契千古心片
月瀉寒練疎雲澹流陰俗塵飛我緇名跡寧見侵靜念

真素流端居積幽沉何當啟玄秘一奏瑤華音

聚齋

黃中貴通理至文斯黯然如何表暴士藻飾徒外鮮斯
人當自治齋居日乾乾聚衣服明訓白賁守聖言豈無
黼黻章所惡非至玄山輝玉蘊石川媚珠藏淵炳外會
有時弼中道彌宣

慎獨

涓流一髮細厥患誠滔天煌煌燎原火起自冥爝間人

生理欲幾相去良亦然滋明實隱微昭灼天與淵所以
徃哲謨慎獨垂至言存誠保天君兢懼無過誓撲燄在
始熱塞患當其源美哉屋漏詩三復當拳拳

拙齋

渾沌七日死衆巧雕斲之孰知希夷初民生乃無為所
以漢陰叟機事戒莫施抱甕豈不勞我心恒自怡

習靜山房

潛虛念無事幽齋閉空林超然燕坐間孰識靜者心悠

悠塵慮忘悄悄天籟沉良斯守玄默何必丘中琴

其二

萬物互轆轤探探無停悰我心念何為淡然惟抱冲鑑
明止水靜雲斂青山空始知造化樞乃在淵默中

其三

齋心遁喧俗一室絕垢氛寥寥天宇空鏡覽萬化源芳
林謝春花空山變浮雲理勝亦有時於茲可忘言

其四

莊生宇宇泰老氏念無為惟應屏物累可與悟玄機狂
流射波瀾世路多險巇此心方寂如安能為變移

養素為黃山道士賦

太始遠無象浮生多磷緇紛紛白黑間誰能辨雄雌至
理一朝變文章雜然施雕斲已喪青黃木為留念子
葆冲素觀養得所宜一氣每獨完三素流華滋黃農有
真趣坐見淳風熙

味菜居為俞延平賦

菜根有真味淡漠良自然長筵列冰壺愧彼腥與膾況
君理劇郡日晏飽一饘已瘠民以肥何必具萬錢鄙哉
肉食譏不顧口爽言惟應勵斯節可以酌貪泉

永思堂

茫茫宇宙內蕩蕩成古今淒淒霜露繁惻惻遊子心終
天何漫漫長夜竟沉沉庭闈不復趨宰木風滿林林中
有啼鳥嗚嗚吐哀音感茲物性微我懷良不禁入室若
有見君蒿或來臨區區抱遺體戚戚幽怨深嗟余念弗

髦多難早見侵為君賦永思潸然淚盈襟

夢萱堂為孫進士子良題

堂前種嘉草端以志親憂我憂何能忘愛日遲此留如
何一朝變庭樹驚高秋悲風委殘綠薄暮寒颼颼緬懷
堂上人欲展情無由慘慘隔下泉冥冥閉荒丘惟應中
夜魂庶以慰永愁

其二

中夜有遐思寤寐忽見之覺來起徬徨四顧令心悲是

時返哺烏方遶庭樹枝微禽果何知亦各懷其私念我
罔極恩欲報情何施鑑帷月娟娟動慢風淒淒鸞哀不
成章隕涕雙漣沔

其三

白楊風蕭蕭日久來古道不見堂下萱空吹墓間草緬
懷疇昔時如何間音儀入室若靡至出門當訴誰上山
山有巔涉水水有涯傷哉陟岵心永作終天悲

其四

日沒晨復旦海落潮再生如何長逝魂終天竟冥冥長
風振林柯颯爽久不停心將寸草折淚逐衣線零倚門
不可見登輿竟誰榮眷茲椿與梓潁仰當中庭

愛日堂為陳編修全賦

羲和整六轡晝夜無停機青陽方屆候朱火倏已馳壯
士感芳歲佳人惜流暉懷我孝子心視景起徘徊奉觴
庭闈趨喜懼恒共之去日不可留來日方在茲中堂絃
管清疏房幃幄垂誰揮魯陽戈為我駐四時

節婦吟為上虞黃氏作

祁祁寒日暝嫋嫋秋風涼淒淒捲素幔切切悲空牀昔
為雙飛鴻今作獨宿凰妾身豈復惜子幼姑在堂捐生
諒非難老稚誰扶將日月良有食海水良有極妾身千
秋年當化山頭石

虛舟

剡桂破崑玉剡蘭移楚芳濟深良可憑橫淺徒自傷偶
值蒙莊叟無心寄大荒

山中寄郡城諸生

還山見孤雲悠然與心契
素琴橫石牀泠泠寫秋意
却憶社中人寥寥在城市

厯峰蘭若宿偉上人禪房

烟林晚蒼蒼白石開禪扉
閒中叩幽寂恍似東林時
大千息羣動水月破陰霏
出世逢真僧允矣旃檀枝
空香出深竹梵貝諸天隨
真源寂無取化有潛一機
嗟我食色身未能釋羣疑
嘗希妙高聚洞豁杳莫窺
因心了衆

幻稽首成皈依

秋夜齋居懷唐泰

高梧月未出暝色疎烟裏
雖鳴鴈來聲在秋塘水
孤燈捲簾坐寒影對窓几
青空吹微霜瑟瑟動輕葦
援琴不成音感別在千里
誰值晨風翰淮波盼游鯉

寶山蘭若

山門隱松桂花雨浮半空金
仙青蓮居乃在烟霞中
石竹覆紫苔四壁泉濛濛
因窺一燈影晏坐萬劫同
衆籟

清梵音浮塵愧微蹤願言別苦海永矣投禪宮

登仰山一覽亭

久懷名山遊偶宿翠微寺化城依寶坊累劫即初地心
空萬籟寂夜久衆壑閉寥寥水月觀了了獨忘寐凌晨
覽孤峰更在白雲際躋攀興未已恍惚身若寄危欄
而倚曠望海天細松際烏鳥巢簪裾落烟翠惟時物候
肅千里軼纖翳神行極空濶豁爾心目霽翩翩鶴影
冉冉芝蘭氣浮蹤浩天遊蟬蛻隔人世顧余眷名藍似

與夙緣契因偕緇錫侶尚覺章甫累便當脫塵纓投情
緬靈異

牛路春耕

晨光照墟里屋下春泉鳴驅牛出東阡旦作農事畊不
惜筋力勍但願禾黍成遐哉鹿門意千古斯能并

龜湖晚釣

投竿緬平湖興與雲水俱直鉤豈無取所志不在魚荷
蓀者誰子得匪商賢徒偶來坐磐石共諒希夷初

兔峰孤月

靈鵲墮寒羽清輝澹溶溶誰將一片秋絳向溪南峰蔓
壁絡金鏡陰窻鳴夜桐幽懷迥未已香靄東林鐘

鶴峰閒雲

前溪孤嶺秀旦夕浮雲陰暝結鳥巢白靚連蘿萼深蕭
蕭丘中賞游心在鳴琴悠然太古調相期鸞鶴岑

龍寺寒泉

靈源沁寒泉仍在翠微頂中有修鱗蟠白日烟雨暝山

仙習止觀水客照孤影子亦洗心人坐來白雲冷

烏崖積雪

陰崖積空雪粲粲照前嶺山人拂瑤琴風來布衣冷疎
林浮曙色孤鶴沒去影疑有剡中人溪頭櫂歸艇

塹石歸樵

旦出事斤斧薄暮歸青林澗迷猿鹿引路滑莓苔侵白
雲覆我頂山風吹我襟嘯歌靜炎燠邈矣烟霞心

漳溪晚渡

微鐘逗前林林端晚烟發扁舟去俄頃雲水空超忽中
流離思起天際孤帆沒日夕緬同心相看成楚越

草堂成題以見志

幽棲構茆宇窈窕雲蘿中潛光葆真素遂此達世蹤青
山列前楹金飈但鳴松聽之比竽瑟玩之若芙蓉簪玉
豈不華列戟非凡庸重關邈天路短翮慙排風瓢飲潁
水淥色謝駢氏封散帙期道侶假寐登方蓬茲焉遂偃
仰沆瀣應無窮

其二

五陵遊俠場中林隱淪託寄情傲世詮矯志在玄漠況
茲棲息地風景擅丘壑瑩神汰餘滓引氣事虛躋匠樗
笑支離莊瓠慙渡落有時睇崇丘緬想契衛霍雲霞冠
層巔松桂被叢薄金膏遠輝煌水碧亦連礫采掇欲有
貽玄情在寥廓

其三

自惜藜藿腸不懷肉食憂鳳凰覽德輝黃鵠千里遊出

處各有宜何必相嘲尤羊質冒虎皮祇足承之羞誅茅
架岩壑遠託茲山幽追攀絕人競靜然保自修朝擷石
上英夕漱澗底流五難一脫畧養生復何求

其四

金張七葉貴出入珥漢貂亦有張仲蔚中園隱蓬蒿窮
達自有分貴賤匪一鑣誰知衡茅中於焉可逍遙閒從
閔叔飯幸有顏氏瓢夜來白露團商聲振林颺冷然白
雲章遠和綠水謠緘辭寄三島目極天寥寥

其五

寒谷待鄒律虞韶來鳳儀堪坯育萬化感召理亦微
谷風應兔嘯空雲擁鱗飛茲生豈不念潛躍會有時
況予輪翮纖而乏塵世姿雖不事巢蟲敢與周任規
超遙一死生散朗忘是非陸沉古有然安用人所稀

瓜田寄南山處士

種瓜一畝間榛蔓苦翳之雨深苗未抽惻然令我悲
侵晨行荷鋤芟刈亦忘疲仰觀天宇寬俯視羣物滋
却憶

南山老終年澹無為

練溪

波小水溶溶湍急秋濺濺颺風皺微綃漱月皎平練鮫人寧敢專謝客或來玩

菊逸為三衢金山人賦

百草委霜露黃花濯其英端居忽見之遂此遺世情臨風擷朝餐採掇巾袖盈顙頤良所願況云製頽齡

其二

閒居何所營種菊繞籬下種之亦何為愛此傲霜者秋
香襲衣裾寒色墮杯筯豈無洛陽華所貴輪鞅寡

其三

結廬避喧俗青嶂託四隣乃知寰壤中而有羲皇民間
邀白衣酒坐對黃花晨所樂憂患除陶然任天真

其四

郊原掩窮秋孤思久寥寂賴此霜下英庶以見顏色開
尊命濁醪取酒聊自適坐望飛鳥還不見南山夕

點蒼山為戴少府賦

峨峨雲中山萬點積蒼翠壯為九夷尊獨立九嶽外孤
峰溢層雲衆壑走空籟仰瞻參旗光坐見斗杓大乾坤
寄端倪日月論顯晦真流入微茫焚鳥飛靈霽秋高崖
勢豁春至林影碎天聲迴滄溟晚色浮渤澥登攀客趣
恬眺覽宦情醉褰帷與駐筇為我謝先輩

畫馬篇為童將軍賦

聖皇覽乾馭天駟流星芒太乙貺靈異倏見渥水傍神

精何權奇意氣尤軒昂兩顧夾明月四蹄亂秋霜早為
汗血駒三載清大荒長驅掩上征逸態凌雲翔騰日
萬里脫畧誰能當歸來驂六龍殊恩擅中黃賜浴天池
津剪拂鬚鬣張顧影驕玉姿含嘶泛清商丹青特餘照
對之亦騰驤駕駘世豈乏伏櫪空成行

題醫師卷

相業久寂寞濟世誰稱賢賴有肘後書可拯斯民顛親
逢長桑君飲以上池泉置之百一方洞見五臟偏羣生

欲為開天札相沿旋七粒或見遺沉痾頓而蠲至哉神
聖功可以侔化玄中和遠莫躋獨與岐黃專奈何媚疾
者尚忌良工先腠理忽不治膏肓竟胡痊因君感吾衷
示此元命篇

晚宿雙峰驛樓與故人陳哲言別

山暝烟已斂林涼月初生扁舟沿江汜候吏欣相迎登
樓引孤興開筵坐空明杯分斂溪綠簾捲雙峰青几席
湛碧流蘭氣浮冠纓泠泠露叢鵲中夜四五驚偶因念

物性終焉感吾情十載懷一枝三匝棲未寧茲晨胡為
哉又逐孤雲征良宵一邂逅明發增屏營蕭蕭衆籟寒
萬壑同時鳴緘辭別知己解纜搖行旌

讀書樓為四明王子沂賦

曠野豁烟翠層梯標石叢奎輝貫窓牖颯颯來天風良
宵清諷音飄落如半空雅調既云遠古心誰與同豈無
華構崇飛軒切層穹春風羅綺醉落日烟花紅詎知靜
心者兀坐窺鴻濛游心太古巢寤寐雲霞中幽艷適自

媚清芬在無窮

題畦樂處士成趣園

凌晨啟柴扉有客過我廬
雕鞍照玉勒輕紈曳羅襦
入門坐高堂騶從閒且都
自言匪他人少小六郡徒
二十登漢朝三十執金吾
五侯吐然諾七貴相追趨
笑我久淪落勸我無迂疏
富貴不早致白首徒替如
而我聞其言笑謝陳區區
緬彼堂構姿安用散與樗
以茲避軒裳
悟靜解天誅
況云樂丘園
取適自有餘
朝寧邵侯瓜
夕

灌鮑氏疏榮辱不我干憂患豈我虞閒心託浮雲不知
卷與舒揖客上馬去還歸倒一壺

其二

遠生貴忘我守靜體自然外物苟不榮取樂無過愆鼎
食豈不甘軒裳詎匪賢大功難久居盛名難久全淮陰
登將壇條侯寄重邊寵辱一朝異殞替誰能憐寧茲遠
世氛寄身在中園閒濯魚父纓時誦老氏篇曠志適古
初冥心超至玄知止幸不死胡必誇輕儇嗤彼當世人

碌碌隨貨遷端居有真趣此意誰能傳

其三

勞生厭喧市養痾閉幽樊角巾念何從孤興寄南園南
園曠且深春至卉木繁嘈嘈鳥雀鳴聒聒泉流喧呼兒
牽蔓離殷勤薤荒殘時雨條已至佳蔬茁而蕃臨風襲
芳馨繞籬擷蘭蓀倦來聊自息支頤對前山載歌綠水
詞和以白石言東陵有傲吏邀我相與旋取意一自慰
此外寧復論

其四

稍烟吹林墟微雨被空谷
雜來翳層陂秀色宛如沐
籬落相逶迤鳥雀繞我屋
行行出幽徑散帙寧見束
濯纓臨清流解帶絰修竹
殘花明亂畦曲沼蔭喬木
神行趣已恬理愜心自足
閒情適虛曠空籟時斷續
茲焉謝紛擾亦以靜歆燠
山風吹衣巾落日候樵牧
顧同張翰心寧事季主卜

題友松軒

交友道日喪伐木空遺音
因人樹榛杞感物論素心
豈無桃李花朝芳夕仍改
何如松樹枝青青色長在
傾蓋白日晚忘形霜霰深
庶其歲寒意永矣諧南金

題黃鸝圖

伐木輟遺響索居抱幽清
緬此幽谷姿如聞求友聲
我欲往和之水綠春山青

辨誣代常山吳權作

相逢白晝間豈盡攫金者
亦有披裘生採芝當盛夏
東

陵高西山孰辨真與假長睇天地間茲懷向誰寫不疑
懷直躬取惑在同舍白壁棲青蠅可損連成價大夫垂
貞觀庶雪覆盆下

古意二首寄鄒參政濟

火旻儵西流庭柯落疎影端居掩空闌懷人思方水月
華漏疎隙風籟籥玄北殘編散金帙鳴琴罷瑤軫相望
更何許迢迢寄江嶺折芳欲有贈奈此霜露繁憂來當
何理一夕變玄鬢

其二

亭亭江上樓綺窓洞然開上有愁思婦感嘆當為誰良
人別經年遊宦苦不歸憂來不自媚堂下尋履綦感彼
三春花將同秋葉飛中懷如轆轤日夜不停移高堂張
素絲彈作別鶴悲餘音入雲漢何由使君知

晚至洞神宮

晚直下仙闕乘閒清道機福地集萬靈迢遙麗神圻入
門喧有息微風吹我衣烟林閉虛境密竹垂陰扉於時

東嶺霽素月流清輝妙賞愜初願閒心不知歸夜桐有
商意掃石橫金徽

遊靈谷寺

東城領霞矚北山開禪宮松聲度衆壑塔影懸晴空衣
冠有時暇幽期白雲中八水覓解流三生咏玄風上人
啟竺墳說法超羣蒙是時寶花墮十里香濛濛別來問
玄度幾日還相從

楊進士新卜幽居

大隱在朝市蕭然小蓬丘
藥欄醉歌鳥竹逕沿清流
良朋偶而集雜花映觥籌
遂忘簪組念頗似山林幽
片雲池上來傍我几席浮
重遊未超隔佳會何能酬

與諸公同遊神樂觀

涼雨度高閣蕭條秋氣深
洞門薄微寒逸興生前林
道人琳館靜開窓修竹陰
詎因避書簡偶此諧纓簪
掃石鳴素絃遂忘名跡侵
前山倏已見秀色浮重襟
翳翳青桑枝颯颯來遠音
笑言欲遺返落影明西岑

畫葛蒲

晞髮慕遠遊端居閱玄文願言金光草緬此九節根芳
叢何歲蕤冉冉幽澗瀆溪雨濯秀色林風動清芬嘗聞
嵩山客乃是九疑君採佩却百邪服餌諧仙真蓬壺翠
水區玄圃鸞鶴羣吾將整吾駕去與烟霞親

寄壺山道士

清溪幽且深猿鶴邈雲嶠中有冥棲士隱几若埋照我
昔從之遊遠落蘇門嘯顧余指石髓示以斯道妙其言

直而純梗槩領其要別來在風塵擢報中若燎未遂鴻
鵠舉將貽碧山謂因之寫雲緘日夕引遐眺

題林處士壁

荒居厭藜藿寂如張仲園閒來枕肱卧廓爾排真筌仰
觀浮雲生舒卷任自然綬無蕭氏結冠乏貢公彈瞋色
起修竹寒光流遠川因心玄冥子共樂壺中天

別意寄友人

北風吹浮雲飛度秦淮水西江與之馳迢迢去千里端

居懷離憂對此曷能已在昔巧笑言宛若雙飛翰別來
不須臾邈在天南端為君啟瑤琴臨風時一彈中有白
雪操哀響聲未闌日月有弦望寒暑亦循環棄置苟不
移相期金石堅

寄題吳太僕鑑滁州皆山軒

環滁富山水秀特東南叢蒼蒼瑯琊峰削出金芙蓉
芙蓉夾蕙帳萬壑縈相向岩烟吹亂霏滅沒不可望昔人
五馬來笑舉青霞杯雙旌舊遊處石徑滋莓苔至今餘

松聲瀟洒在林薄絕巘瀉飛泉孤亭倚寥廓懿哉延陵
君此地懷清芬開窓引列岫坐詠醉翁文醉翁久不作
羨子有仙骨良時但開尊公暇惟拄笏雲生鳥樹沒雲
散翠微連壁月動海色亘若壺中天嗟予戀塵鞅青山
勞夢想為君發孤吟風泉寄遺響

秋夜同諸公神樂觀玩月

秋臨萬象空良夜寂如水了然東山月照影清尊裡塵
蹤厭汨沒緬此方悠然况有仙壇高俯瞰區中緣坐授

紫霞笙嘯引琪林鶴參差斗未橫零落露已薄朋簪諧
夙驩佳期感二難中思拂衣去永卧烟霞間

初秋夜坐寄王紋

輕颺生早涼孤館清興發桐陰落前墀遙空瞰華月方
此抱冲素況值清境豁濁酒聊自持瑤琴弄應闕知音
念乖阻咫尺不可越相思良未已坐見曙河沒

送張謙

東風變碧草積雪開紫垣都門集同袍酌酒送行軒劍

歌一何長波烈驚心魂丈夫顧義分豈為兒女言名駒
出幽隱枳棘鳴祥鷄千年值嘉運萬里期騰騫

其二

崑山固多玉抵鵲良可悲羣龍方盈庭子行獨何之空
懷徑寸珠粲粲五色輝相投不相矚魚目甘同歸至寶
豈真秘良材終見希誰能辨瑜瑾遲爾黃金閨

其三

醉呼秦淮酒臨岐歌慨慷吳姬小垂手一曲春風長扁

舟不停橈去路但茫茫青山入楚甸白雲思越鄉豈無
壯士懷擊節心飛揚憑將繞朝策一贈囊中裝

其四

海鶴青雲姿豈解司晨鳴時來暫斂翮終當遊太清奔
鷄復何知開口笑沉冥飢來不飲啄再唳長風生請看
昂藏軀寧與雞鶩爭維應瑤臺鳳可與蜚英聲

其五

故人發白馬翩翩臨路歧腰間脫玉劍贈子表相思霜

缺爾勿彈狂歌欲為誰英風洒毛骨四座驚別離別離
豈足惜意氣方在斯何當凌九萬並駕青雲歸

投胡學士

撫劍坐中夜長吟思一彈彈之有餘音激烈摧心肝出
處分以然中道敢不安但恐春華衰白日凋朱顏伊余
羽翼微宜棲枳棘間清樾苟自適誰能事鵬搏那因遇
知己刷羽排鷁鸞雲霄一翱翔九萬期風端昔侶丹穴
雛志薄金瑯玕今如涸轍鮒鬚鬣空摧殘有沫不自濡

馬能禦所患淮山饒桂枝楚澤有芳蘭欲去戀明主引
領徒悲歎故人把天瓢豈憚一滴艱願因終號呼庶以
脫險艱毋令東溟使仰候西江瀾

送僧歸越中

錫挑龍河雲衣帶越溪雨說法方西來隨緣復東去松
枝偃故房栢子落庭樹從此上方遙人間但凝佇

虛舟集卷二

欽定四庫全書

集部

虛舟集卷三

詳校官國子監臣納麟寶

中書臣劉源溥覆勘

總校官原任中允臣王燕緒

校對官中書臣康儀鈞

謄錄監生臣戈廷模

欽定四庫全書

虛舟集卷三

五言古詩

賦得幔亭峰送張員外還閩中

秋色照海甸，百里青嶙峋。衆山如游龍，一峰高出雲。昔傳武夷君，於茲宴曾孫。鸞鳳載河車，來往何繽紛。羽蓋云已久，玄賞今尚存。夜深天籟寒，猶疑鶴笙聞。而我昔

明 王偁 撰

遊覽望之隔塵氛天影瀉潭鏡翠碧明微曛別來區中
緣汨沒摧心魂茲山不可見夢寐懷清芬張侯有仙骨
幾年在雞羣中林赤松期久負瑤池尊斯行問初服訪
古清溪瀆幻宇結空翠層崖閉氤氲棹歌九曲來餘聲
振衣巾玉女或可訊為余謝天真

送呂沁州

良材蔽幽壑大匠終不遺驂騑困百里伯樂為之悲顧
無適時材焉能嗟明時使君姑蘇彥夙負英俊姿開口

論阿蒙耻為吳下兒
倏起佐民邑
頗令絃誦施朝餐
戒貪泉
夕寐抱素絲
松柏有貞操
不受霜雪欺
一旦勞譽流
徵書走南陲
衡鏡懸大庭
準平良在茲
五馬錫中廢
雙旌擁前麾
銅鞮古沁源
尚在羊腸西
居人迎露冕
稚子瞻纓綬
行將寄專城
蚤為蘇民疲
春風五袴謠
莫遣歌來遲

送杜參政之廣西

五嶺隔南服
輿圖亦茫洋
昔為椎髻區
今變冠裳蕩

蕩風氣開生齒日富強叢山薄大海壯哉封四疆邇來
覃聖仁幽昧靡不彰人材上國齒兵賦擅一方惟公寄
重牧虎節何輝煌上以紓國懷下以撫凋傷當令寒谷
吹撫指回春陽桂山方莪莪桂水亦湯湯誰與傳誦聲
千古流芬芳

送胡處士還豫章

我懷高士風矯然若游龍南州久寂寞水碧青山空夫
子振流俗清芬千載同明時棄軒冕白首棲雲松出門

不遠適西到匡廬峰天風吹衣巾飄落塵鞅中倦翮思
故林孤雲懷舊蹤角巾洒秋雨別我金陵東冠蓋餞道
周雕筵進肥醲揮之一不顧舉目送飛鴻寒波駛歸流
川上落日紅孤鶴修已遠悵望那能窮

送胡郡守歸泉州

吾君撫城運治化期虞唐藹藹吉士征庸庸登廟堂南
風五絃奏端拱垂衣裳鷹隼有時擊威鳳鳴崇岡夫子
南國秀乘時亦翱翔姓字落御屏久霑雨露香茲晨按

節去肘後懸金章春來刺桐花飄飄點仙裝
塞惟出白鹿竹馬夾道傍愧我斥鷃姿遠逐
鵷鷺行送君都門野握手神飛揚雲開五湖
白鳥沒吳天長雙旌忽不見酒醒山蒼蒼

送徐布政之廣東

連山隔星紀雄藩控邊陲內分青瑣彥遠
牧滄海涯春雲擁畫戟白日明繡衣一朝
立意氣萬里生光輝都門別同袍尊酒秋
風時丈夫貴有為豈作兒女悲停杯贈

馬策脫穎囊中錐何必守章句終年困蓬藜

送劉太守之任福州

海國變民俗君行領專城千室豈云小所志在蒼生烈士慕知己編民歸頌聲驅馬登古臺覽望窮滄溟山雲拂露冕海月生霞旌鄙人舊茅屋桑梓連雞鳴溪流九曲水門掩三山青異時偶樵牧此日慙簪纓因茲送君去悵望難為情

送鄭舍人之嶺南

祥因散華甸靈景耀神圻東序盛玉帛南面垂裳衣五
獄畢効靈八荒殫同歸欣欣木德榮郁郁皇風熙商雲
從何來欲抱紅日飛微風忽吹去使我心徘徊春山黃
鳥鳴離筵醉斜暉迢迢江漢流此會當何時鳳凰鳴高
岡載見終來儀文明正茲日忽嘆知音稀

送林少府還九江得月字

握手白下門棹歌莫催發且沽玉壺酒共醉金陵月明
日望匡廬孤舟坐超忽

齋所示同宿諸寮友

華館敞清夜空香靄氤氲孤懷湛如水因之絕垢氛城
闕度疎雨河漢霽微雲明發奉禋祀坐待禁鐘聞

秋署中寄鮑紀善

出門車馬喧秋煬烈如燁不有靜者心茲懷曷由展念
君守幽素閑跡同偃蹇塵榻鳥字頻聞窓畫絲罥誰開
蔣生徑獨契子雲館何時風雨來一洗煩慮道

龍江阻風寄同院諸公

客心疾如飛咫尺隔大江長風夜半生濁浪曉來降戀
闕情豈緩望鄉思彌切且呼一斗酒坐待艫頭月艫頭
月漸明抽簪散長纓潮生揚子白山出石頭青却念携
手好如何寫懷抱明發烟際帆萋萋但芳草

宿釣臺

高堂薄層霄仰視烟霞深羊裘昔何為遺身在雲林漢
宮久荒涼霸業成古今飄飄釣臺絲尚爾清煩襟幾年
倦羈旅扁舟宿溪濱折芳欲有酎洒酒絃素琴臨流恍

中夜霄漢星光沉

過武夷約遊不果

武夷為閩望山余十年三過其下期一遊而屢
以事阻世傳蓬萊方丈去人間不遠顧非有仙
風道骨者莫得而至焉是則茲山之靈異予輒
將以塵跡混之宜其迴轡返嶂却我於風塵之
表因賦此詩尚俟後遊果於何日

扁舟下溪口薄暮煙沉沉羣峰暝色厚九曲寒流深不

見慢亭君徒懷笙鶴音雲霞結飛夢風雨生平林半生
慕山名十年阻登臨長懸紫宮戀未遂滄溟心豈伊真
仙源避我岩跡侵回橈發長嘯起坐鳴吾琴

宿分水關

凌晨起芻秣驅馬白雲間倒窺猿鶴岑薄暮宿層闕
闕門閉古色落日鳴哀湍我行倦前征憩息天風寒下臨
羣壑陰仰視星宇寬攬衣不成寐脫劒膝上彈劍歌有
餘情豈為行路難

題吳山伍子胥廟

朝驅下越坂夕飲當吳門停車訪古跡靄靄林烟昏青
山海上來勢若游龍奔星臨斗牛域氣與東南吞九折
排怒濤壯哉天地根落日見海色長風捲浮雲山椒戴
遺祠興廢今猶存殘香弔水客倒樹哀清猿我來久沉
抱重此英烈魂吁嗟屬鏤鋒冥爾國士存峨峨姑蘇臺
榛棘曉露繁深居麋鹿遊此事誰能論因之毛髮豎落
葉秋紛紛

登金山寺

江近海勢闊中流孤島分化城若浮出鐘梵空中聞真
僧何方來於茲巢白雲魚龍護法界日月棲山門而我
泛梗蹤偶因滌囂紛真源杳莫測積氣長氤氲一洒甘
露言便覺蘇焦焚棲身恍圓鏡永絕諸漏音

發龍江和同官王洪之作時使節之長沙

朝發龍河津駕言適南楚顧茲念王程臨流不遑處是
時長風來遙空霽疎雨羣山坐滅沒千里但延佇豈不

懷友生幸此息辛苦歸命諒有期母為惜乖阻

舟中望匡廬

茲山東南美植立雲霞中九疊縈秀色萬古青苒苒我
懷志靈竒絳帆喜相逢林端望飛瀑天際數雲峰香爐
紫烟滅玉鏡澄湖空飛醉落巾袖毛髮梳天風顧此逐
行役無由訪仙蹤長詠遠公傳坐憶東林鐘

登黃鶴樓

迢迢江上樓飛構梯層穹黃鶴何年來結巢白雲中仙

人整羽蓋一往無遺蹤
瑤笙紫河車瀟灑餘天風
至今啟重關呵守虎豹雄
雕簷敞白日闌檻標晴虹
我因駐旄節登攀興何窮
神行萬物表目送雙飛鴻
依依烟際帆遠落三湘東
霜清楚天碧樹盡荆門空
長辭愧禰生高興懷庾公
落日下樓去烟水青濛濛

望衡嶽

絳席湘水上始觀祝融峯
何人奠炎服植此金芙蓉
下窺俯南極仰攀接層穹
昂昂五峰尊同立元氣中
陰晴

變氣候衆壑應寡同緣蘿石磊磊噴壑泉濛濛遙洒洞
庭雪五月飛涼風伊昔禮明禋望秩猶三公靈湫出雲
雨有禱無不通離明舞朱雀星紀專化工而我契冥漠
覽眺殊未窮火黎記昔冢圯剝今無蹤營丘秘真圖孤
魂竟誰從浮雲爲道沒白日長天空惟應弔虞舜一嘯
蒼梧東

游浯溪錄呈陳司馬及同登諸公

客舟曉探奇興落浯水上蹇蘿豁遠目所志窮異狀是

時天宇晴物象自清曠烟開楚山斷千里彌一望遐延
極覽眺近歷飽搜訪層崖劃中開峭壁摩萬丈顏公英
烈姿元叟士林仗文辭金石奏字畫蛟龍壯伊余抗塵
容所志在清賞孤雲寄微蹤獨鶴引空杖豈無千載懷
亦有高山仰同遊二三侶相與情頗暢芳蘭薦山庖林
瀑洒竹帳醉揮紫霞觴亂落白雲唱歸舟漫容與潭月
吐雲嶂幽興任時違心遠覺神王但云諧斯遊何以答

清貺

全州道中

夾道松栢千株前守章復所植

全南走百里碧澗緣幽岑躋險屢得勝曠望清煩襟道
傍茺茺松誰氏甘棠陰聞有章大夫昔年茲撫臨政循
俗云變世遠澤尚深顧茲千植繁蓊沃猶至今天長日
色薄風靜雲滿林我行念徒侶苦被名跡侵畏影且息
陰避喧聊洗心據牀久兀傲思奏丘中琴知音何寥哉
猿鶴空哀吟

南海登粵王臺

載酒豁清眺，嘯歌粵臺巔。粵臺久寂寞，海色空蒼然。荒
城南斗外，碧草春風前。雲木隱暝色，落日哀啼鵑。緬懷
全盛日，萬里恢疆躔。疏封赤社大，列雉南溟專。茲臺一
何高，頻視如控弦。運化神物改，代徃陵谷遷。千金買辯
士，古瓦空寒煙。惟有山僧來，此地開梵筵。諷唄發深夜，
鐘鼓羅諸天。觀物理，則如倏徃。猶千年，誰將峴山淚為
洒南雲邊。

南海郡庠宴集書贈董郡博

高堂輟絃誦秩秩數賓筵朋來何雍容對此方穆然勸
酢禮有加陟降容無偏芳蘭發中座品物羅庶邊是時
海雨至須臾遍南天夏日如涼秋清風洒軒懸酣情久
已暢秉德良益虔用言賦茲什以代伐木篇

龍州道中

微生易為役遠節恒自持夙興戒前征萬里投南陸迨
迨古龍州山徭雜羣夷浮雲翳兩曜衆壑昏陰扉由茲
望明都尚隔天一涯淹留暫停騎促刺心不怡所媿予

桑戶中林人見稀

交趾贈節鎮黃司空

補袞美周甫分岳咨堯牧晤言懷古人于茲緬芳躅圭
璋信偉器麟鳳豈凡族天南一星明萬里忻共矚謁來
炎海濱莫拓古輿服懷柔心為勤撫馭令尤肅政淳回
澆漓仁遠起頽伏鯨濤安中流鳥語變華俗頓令天地
春浩蕩被陰谷伊余慕光華幸此近膏沃衆中覩節鉞
丰采朗如玉天狼晝已墮神珠夜當復願言歌德音吉

頌愧清穆

交州病中喜林伯正大參歸

孤館抱餘瘵殊方積沉憂况茲風雨交薄暮來颼颼中
夜夢九遷上國魂獨遊豈無同心人曠望阻林丘驅馳
王事勤未得休戈矛旦坐念睽違此會良悠悠忽聞擁
前髦載見迴輕輶欣遂懷如開晤言疾徐瘳須臾笳鼓
悲耿耿星漢流餘情寄長劒激烈何能休

出雞陵關

手麾白羽策凌晨出夷關夷關春始開行旅多歡顏笑
掄青澗流為洗瘴癘殘浮雲引征佩共結輕陰還前登
忘險疲憑高眺林巒却憶征南暮溟濛海霧間

宿烏岩灘

扁舟宿層灘灘漲夜來雨飄飄遠客情寂歷榜人語登
途畏虎跡突瀨逢鱷怒東山尚沉冥推蓬幾延佇

蒼梧道中

驅車九疑道獨鳥東南飛看山不覺遠秋雲生我衣深

谷走羣籟半岑明夕暉中林有蘭茝薄暮空芳菲

道上觀別者

完山有鳴鳥其聲一何哀死別徒已矣生離當告誰聖
人出應期玉燭耀九垓三殤無怨苛四表罔不諧爾行
獨何之萬里觸炎埃五嶺表異服更邈天一涯毒螫噬
人肌瘴露冒草萊荷戈方前馳夙夜敢怠哉去去逐行
侶悠悠念中懷心存長相思身沒淪死灰願同六月志
倚輪為徘徊落日雲始暝長嘯悲風來

曲江謁張文獻祠

停舟曲江許願言謁遺祠巖巖始興公遺澤谷在斯堂
傾風雨萃碑斷苔蘚滋芳春真行旅落日歸文狸唐宮
昔全盛衡鑒方獨持弼諧展嘉猷讜論非詭隨雖雖朝
陽鳳粲粲補袞絲側聞卧病後九廟烟塵飛漁陽突騎
來中華混羣夷信知砥柱功用舍同安危昭陵鐵馬空
仙李祚久移維餘蘭菊存千秋恒若茲我來薦微誠再
拜當前墀顧瞻廟貌間風度猶可希武溪何淫淫蓉峰

亦巍巍只今相業隆孰與前修期臨風一長嘆山雨來
霏霏

過清遠峽

兩山夾飛流曲折始東走排空殷崩雷出峽去愈驟商
人數畏津漁子駭奔溜回瀾乍窺淵迸瀨亂洄竇上當
羣石爭下及衆川激勢齊龍門險雄長碣石右惜哉神
禹功莫畫遠莫究遂令五嶺南別與萬靈關我行一停
舟適值風雨候崩騰心為徨澠瀆目已瞀篙師戒前征

薄暮不敢逗開蓬訝驚湍宛若羣鷺遙乃知造化神茲
寔亘宇宙三復忠信言呼酒聊獨侑

過道源書院謁濂溪祠

百家騁異說聖道汨其真運極理必反光嶽生斯人手
探闔闢樞示我動靜根絕緒既有授再見宣人文二賢
韓華夢中州儀鳳麟遂開濂洛流遠接洙泗津大哉作
聖功疊疊光後塵我昔披圖書玩讀忘苦辛微言冀可
會弱質慙弗振況經講道邦仰止希先民其如觀光霽

衆草閒庭春晨興策我馬遲暮膏吾輪逸軌尚可駕敢
云替斯勤

舟移豫章高士亭址下寄新喻文學潘時彥

雲水極杳靄一櫂東南歸青林相掩映白鳥烟中飛新
蒲乍隱舟漫流侵夕磯偶尋高士宅忽悵故人違搖曳
鳴玉琴誰云出處非明發引前望五老收陰霏

送林大全赴天台縣幕

枳棘宿鸞鳳百里淹驂騑郎官古猶薄况秉帷幄籌君

如紅蓮花艷色閒且幽芳馨當自揚豈值濁水流
如蘭世方敦服艾衆所羞匪無太華仙置爾玉井頭去去但
自保毋以增煩憂

幽中送張用剛還晉安

海水天際落北風捲蓬根愁烟結遠思薄暮空紛紛
京洛子不留驅車出都門離筵楓葉下客路遠聲聞
借問此日還何時鷗鷺羣舟移九曲棹樹隱重關雲
笑我鸞鶴姿久閉樊籠春烟霞有歸夢為爾飛吟魂

七言古詩

前有尊酒行

前有尊酒我為君壽有瑟在筵有醵在手青年既阻白
髮被首於今不樂古人奚有自昔有言侯河之清人壽
幾何云胡不醉起舞傺傺側弁以俄弗鼓缶而歌恐大
耄之蹉跎秋露如玉下被庭綠良夜未央胡不秉燭東
陵死利西山死名莊周放達禹稷躬畊吾誠何暇以論
此前有尊酒君須傾

長歌行

有淚莫泣鮫人珠有足莫獻荆山玉赤心徒使按劍猜
至寶翻令笑魚目千金蹈海稱達人五噫出關西去秦
負芻不復遇知己空歌白石南山春楚卿棄相復何有
於陵甘作灌園叟雜縣偶集魯東門惆悵胡能事杯酒
長風蕭騷百草殘長鋏悲歌涕沆瀣金臺駿骨久已化
瑤水風波不可攀畏途羊腸能折軸緘書為謝雲間鵠
海上三花久負期醉歸漫託平原宿

將進酒

故人手持金屈卮進酒與君君莫辭
仲孺不援同產服
孟公肯顧尚書期當歌激風和結楚吳姬白苧莫停舞
黃河東走不復回白日經天豈能駐田文昔日盛經過
朝酣暮樂艷綺羅高臺已傾曲池廢祇今誰聽雍門歌
我有一曲側君耳世事悠悠每如此子雲浪作投閣人
賈生空弔湘江水春風南園花滿枝莫待秋風搖落時
東山笑起徒為爾乘時莫負高陽池

古別離

將軍嫖姚北伐時漢兵五道同出師使者三河募豪傑
材官半是幽并兒鴈門燕郊一丈雪交河蹴踏層冰裂
鳥旆遙翻青海雲蛇弓亂射陰山月青海陰山若箇邊
芳閨桃李為誰妍三年玉筯頻啼處萬里金釭尚未旋
機中錦字織成久漫訴相思別離後鴛被春來夜夢多
龍沙秋盡寒川走飛書昨夜入咸陽詔更徵兵屯朔方
苦戰匈奴圍未解鐵衣著盡邊庭霜邊庭風霜那可度

望斷關山不知處衣冠詎惜鸞帶賒樓高枉盼鴻音暮
自古封侯燕領身肯思中婦鳳樓塵但令疏勒風烟掃
甘作陽臺雲雨人

怨歌行

絃奏鈞天素娥之寶瑟醉傾紫霞碧海之瓊杯宿居七
采流蘇之錦帳坐我九成白玉之高臺臺高帳煖春雲
薄金縷輕身掌中托結成比翼天上期不羨連枝世間
樂歲歲年年樂未涯鴉黃粉白淡相宜卷衣羞比秦王

女抱衾肯賦宵征詩參差雙鳳裁筠管誰信韶華有凋
換魏園未泣龍陽魚漢宮忍聽長門雁長門蕭蕭秋影
稀粉屏珠綴流螢飛苔生舞席塵蒙鏡空傍閒堦尋履
綦宛宛青陽日將暮惆悵君恩棄中路妾心如月君不
知斜倚雲和雙淚垂

行路難

倚劍且勿嘆聽我行路難世途反覆多波瀾焦原九折
未為艱君不見漢謠斗粟歌未闌長門一夕秋草殘骨

肉之恩尚如此何況他人方寸間又不見絳侯身榮應
繫獄賈生終對長沙鵬功成更覺小吏尊才高寧避明時
逐所以赤松子遠赴中林期誰能吳江上見笑鴟夷皮
驪龍有珠在滄海勸君逆鱗勿嬰之子推介山下屈原
湘江湄當時杙鑿自不量至今憔悴令人悲行路難難
為言滄海一棹且歸去長安大道橫青天

少年行

千金換寶劍短髮鬢長纓銀鞍照紫燕颭沓洛陽城洛

陽城中足年少陌上相逢開口笑按缺長歌猛虎詞彎弓直上呼鷹道歸來買笑何所驩白日擁擲夜未闌百觴每共孫賓醉一飯羞從漂母餐吳姬二八小垂手短笛橫吹折楊柳一曲臨風意氣生珊瑚擊碎亂從橫春來秋去只如此五侯七貴為知己却笑侯嬴空抱關白首夷門不暫閒

短歌行

東風吹花墮錦筵楊柳半暉青樓烟主人自為鴝鵒舞

小妓更奏鴛鴦絃當杯入手君不醉落日已在西山巔
短歌一拍心茫然請看明鏡高臺上何須白髮悲芳年

遠遊曲

蜺蜺棲蟲睫鯤鵬運天淵看來小大各有適人生出處
同所然蘇秦未佩六國印一身落魄誰相問相如去蜀
謁武皇高車四馬生輝光以茲感慨慕昔人起秣吾車
膏吾輪出門仰天發長笑寧辭斷梗隨風塵朝趨楓陛
謁明主夕掌蘭臺作貴臣自謂半生有奇遇從閒因獻

甘泉賦雕蟲小技何足誇白日天光屢迴顧朝回勅賜
飛龍駒玉勒光輝驕道隅雕筵象几進綺食不但醉飽
同侪儒君不見漢家主父寧久貧買臣無復恒負薪當
時妻子笑相薄一朝四海來相親閔生寂寞困藜藿榮
期憔悴蒙埃塵請君試聽遠遊曲何必長為畎畝民

塞下曲

君不見鴈門九月風如刀筋強蹄健騰天驕邊庭列障
走烽燧旄頭夜出天山高陰磧茫茫走千里刁斗聲沉

塞雲紫重圍未破殺氣昏萬衆同呼士心死起看壯士
皆裹創援桴鼓之氣益張三軍奮迅一敵萬戰龍血染
天為黃自此匈奴知姓字漢家盡雪穹廬恥可憐白首
未封侯一片雄心向誰是

君馬黃

君馬黃我馬白二馬同嘶出南陌南陌東肝夾濁橋馬
行平地似青霄羈金絡月人皆羨振玉鳴珂意自驕朝
出相隨暮相逐可憐人馬皆如玉如何與君生別離君

馬東行我馬西欲知後夜長鳴處羞對鴛鴦一萬蹄

長相思

長相思乃在瀛洲之上碧海之涯閨風蓬壺相蔽虧瑯
玕碧草何離離安期偓佺空有期五龍起舞鸞鶴隨祥
風化日同熙怡碧桃紅杏春滿枝鸞駉鶴馭同遨嬉我
獨何為困羈離弱水三萬不可飛長相思心為悲

醉歌行畲鄭五迪

人生三十古所立嗟余落拓竟何有眼中萬事皆等閒

帳下一經空自守揚雄寂寞人皆羨長卿憔悴誰相偶
五陵西上事已非百粵南歸歲應久侯門無分曳長裾
別墅閒來閉虛牖感懷徒使壯士悲託交何處論新舊
與君一見即傾倒握手相驩情頗厚意氣能凌豪士前
風流肯落當時後每於結客散黃金縱令負郭無百畝
白杜吟來落木秋青山醉倒芳尊酒知己終憐水上萍
年光暗擲門前柳惟有長歌一片心此日贈君君識否
紈扇歌贈別張秀才

手把白紈扇贈君表深情諸君試揮揚座上仁風生紈
扇團團似明月不比君心圓復缺聊將霜雪比貞素那
謂炎涼有離別念爾相携似故人冰壺玉樹宛相親草
聖從經內史筆西風漫障元規塵憶當長信深幽地曾
對佳人掩雙淚此日臨岐一送君莫學秋來便相棄

贈吳六

少年結客遊五陵布衣落魄喜談兵是時氏羌殺主將
邊庭一夕烟塵生當筵意氣許君死飲血報仇為知己

一生猿臂挽兩弧三尺魚腸走千里窮秋絕漠羽書飛
輕身陷陣解重圍眼看旄頭闕塞落手持讐首轅門歸
帳下三杯躍紫燕衆中萬歲瞻白衣功成幕府失姓字
扁舟歸釣滄江湄爾來時平復何有萬事蹉跎付杯酒
昔年蓮鰲吐星鉉今日茅茨閉虛牖大夫感激驚心魂
平原食客有誰存臨風夜夜弔孤月長歌擊筑聲俱吞
閒來遇我何所為未言往事先淒其鬢毛零落已如此
心跡悠悠誰復知

送陳煒

池上百草綠春城黃鳥吟玉壺清酒與君別青山去後
空雲林問君此行何慷慨一嘯揚眉起滄海須使功名
及早成莫教綠鬢流年改拂劍酣歌四座傾共看仙籍
快登瀛上林奏賦久相待宣室求賢方未寧縱醉臨岐
不知晚落渚蕭蕭送歸鴈別路雲程兩地分目極烟江
去帆遠

寄答黃伯亨

我馬從東來君車正西去有似風吹海上雲天際無心
忽相遇與君相遇即相知漉膽輸肝無復疑虞卿豈顧
雙白壁平原輕擲二美姬狂歌一斗酒共醉六屏月拂
曙登古臺慷慨與君別君行五嶺南我阻三山道何處
我思君天涯但芳草昨朝鴻鴈下烟江銜得君書置我
前開緘拂冰雪千里情灑然念昔與君多意氣相期豈
作桃李妍醜生立堂下叔向知其賢袁弘發朗詠謝公
遂回舡丈夫一語苟有合何必結交窮歲年我有古干

將銹澁久棄捐寧甘困泥滓恥為兒女憐君有長歌向
余寫我將古調為君宣月明洞口鳴風泉清商一曲付
哀絃雲山麋鹿可為侶紛紛薄俗何其偏

贈李道士

大樸已散玄風澆函關紫氣騰赤霄邇來蓬壺幾清淺
孫枝秀出何飄飄君從胡來載雲輶仙裾搖曳凌晨朝
紫皇天上吹碧簫左揖羨門右松喬東祈若華壽西母
麻姑綠鬢顏未凋有時馭列缺攜招搖頓降昆吾丘飲

我長生瓢霓為鈴兮風為馬白日羽翰何脩脩吾將挈
日月以觀乎無始與夫子兮遊遨

西亭夜送林六敏還山

今夜西亭月秋風梧葉涼故人發孤興別夢遶林塘浮
世相逢心草草羨君拂衣一何早百畝風泉繞桂枝歸
去南山跡如掃南山松桂北山雲飲澗穿雲麋鹿羣牕
間明月但高枕洞口飛泉長對門知君自是悠悠者何
須叩角歌長夜鄭谷年來秋草稀鹿門誰伴白雲歸君

行好覓赤松子余亦將紉薜荔衣

送吳生赴閩中

吳生落魄志不羈世上悠悠那復知
長希一代賢豪士不學千金遊俠兒
三十窮經坐環堵四壁蕭條但榛莽
客路偏驚季子裘故人誰薦揚雄賦
酣歌擊筑不堪聞中宵起舞思紛紛
功名且付杯中酒富貴從輕天上雲
平生高懷有如此青眼論交見生死
俗流未足論升沉丈夫應須有知己
茲行遠遊何時還西窺太華浮雲間

也知局促蓬蒿底終然莫掩冲霄翰

宿桃溪方翁家贈別

清溪一帶緣桃花春來水上流胡麻東風尋源泛瑤棹
雲中遠見山人家於茲水木相含景裊裊松杉亂天影
少焉林壑衆籟鳴巾舄飛來片雲冷二三老翁住東陂
薜衣霜雪垂兩眉自言入山歲已久不知人世今何時
傳聞有客驚還喜共薦清泉飯松子烟林霧篠不逢人
碧草苔花應滿地問余何事在塵間那似山中日月閒

澗戶聊同魚鳥醉石牀常伴雲霞眠乍逢靈境真堪悅
區緣未謝還成別別後重來定幾時夢繞溪邊綠蘿月
題深溪草堂

草堂住在深溪裡四面牕開玩清泚空翠長浮半壁陰
涼颺時傍虛簾起雲收月墮吟幌明雨過苔侵釣磯紫
心閒野鳥自忘機客至談玄聊隱几高情澹蕩付琴尊
有時落魄不冠履已知人境得蓬丘恍若漁舟問桃水
滄洲有約在投竿白首何心懷帝里祇今方憐世態薄

逢君况值丘壑美荷衣蕙帶或可紉也向溪頭拾芳芷
聽琴歌送方氏逸民歸天台

嶧陽孤桐節風雨中雙鳳幽修語一辭爨下登高堂
徽向黃金思何苦初彈一曲南風生端拱垂衣虞舜庭
悄然再鼓神欲往美人頎而結遐想須臾改調絃亂鳴
引宮刻角流新聲泛如陽春激白雪淡如綠水涵秋清
羨君操成有如此十指游心在千古戶外翩翩鸞鶴翔
松下傴僂鬼神舞世間箏篴徒紛紛可憐此調誰能聞

江湖寥寥少知己抱歸獨卧空山雲

送友還劍上

手把一尊酒送君白下門秋風官道傍落葉何紛紛念
我辭家久為客京華一日幾人別茲晨慷慨復送君令
人却憶故山雲君家舊在劍溪上門外雙峰宛相向雲
屏九曲倚醉過青山別後近如何君行漫浪不須久舊
業荒涼風雨後會予得買南山航蘿逕苔磯一相候

賦得郎官湖送蕭長史

郎官不見今已久平湖誰泛郎官酒芳尊空負東園花
落日長懸漢城柳送君扁舟湖上過荆雲郢樹勝槩多
微風十里留孤櫂細雨三湘送晚波謫仙祠古何寥寞
郎官佳句誰繼作羨君雅調希昔賢湖中早望寄來篇
賦得釣龍臺送友人還閩

九原鹿迹何茫茫五星東井熙炎光無諸功成裂漢土
組練三千還故鄉當時築臺青冥中閒來垂釣滄江龍
屠龍技成去不返至今百粵山河空臺外蒼山落平楚

臺下江流自今古野水荒烟古戍寒落日精靈尚來去
過客憑高眺遠鴻可憐何處聽歌鍾愁雲偏結謝端渚
海月長懸薛老峰故人舊隱螺江側曾共吟秋弔陳迹
此日南歸興不窮別後登臺好相憶

劍潭歌送董大令還晉江

兩山何來勢崢嶸山下碧潭秋水清昔人寶劍化神物
至今白日風雷爭送君南行感疇昔秋深擁棹蛟龍窟
醉起登臚牛斗爛夜涼擊汰精靈出千里寒流赴海深

宦游同到海天濱
明朝霄漢還相會
未必牛刀嘆陸沉
賦得龍江送蕭御史

君不見龍江水流東
到海天塹由來知幾代
三月春潮繞帝城
噴雪鳴濤走澎湃
往事流殘落照中
六朝遺迹恨無窮
清時不用限南北
萬國梯航此日通
烟開目極澄波渺
海門一點孤帆小
勢吞九派落雲間
雄浸三山出天表
江上潮來一送君
中流宛見繡衣新
青年好遂澄清志
莫羨當時擊楫人

送陳將軍還鎮三河

紫髯將軍身七尺早拜金吾未三十臂挽雕弧二石强
腰橫寶劍千人敵曾隨驃騎過祁連論賞平蕃功最先
直向交河馳羽檄肯教烽燧照甘泉名高飛將傳異域
氣凌屬國雄燕然百年思刷會稽恥萬里曾屯充國田
邇來移鎮三河久馬上黃金垂紫綬偏裨皆為六郡英
賢豪不數雲中守平原草色獵騎還鴈門雪盡春歸後
邇靜無傳紫塞烟客來但醉芳尊酒良時躍馬獨朝天

闕下相逢思謁然久知公子能虛左苦憶將軍恒在邊
錦帶紅纓士如虎明日都門仍出祖節鉞翩翩不見君
惟見雲臺天尺五

送楊世顯還溫陵兼寄胡郡守童將軍

八月江南鴻雁翔蒹葭夕露凝如霜典衣沽酒不成醉
遊子此時思故鄉故鄉別來在何許秋風吹落桐花樹
歸夢長懸嶺嶠雲客衣久翳秦淮雨以茲慷慨賦式微
都門祖帳送斜暉舟從揚子江頭發路指嚴陵灘下歸

壺公片月生滄海紫帽嵐光拂翠微溫陵太守蘭臺客
往日詞林見顏色虎頭將軍懸轆轤金尊為爾酒剗沽
到時相見即傾倒為我問訊今何如

贈遼陽僧慧峰

上人出家絕世緣少小入山今幾年悟得真空無住著
手探濁海神珠圓草衣百結幽巖裡晝拾松花飲泉水
野性無心狎澗麋大法時譚聽山鬼遼海蒼蒼接遠天
居人漁獵厭腥膻山中有僧誰解識長日安禪祇晏眠

此生自笑機緣薄，欲接微言解羣縛。
昨夜中峰禮白雲，唯見諸天寶花落。

古劍行贈周辰

殺氣貫斗牛，精光何陸離。
風胡不可遇，千載令人悲。
憶昔干將初鑄日，五夜龍池飛霹靂。
秋水芒寒鶚鵠膏，虹光鋸吐蓮花質。
當年曾聞易水歌，荊卿不濟當如何。
從來相隨赤帝子，颯颯秋郊泣嫠鬼。
乃知神物用有時，風雲變化誰能知。
祇今蕭條鐔水上，白日徃徃蛟龍飛。
俠

客相看魂欲死一片雄心許知己別來夜夜匣裡鳴憶
君清淚如鉛水為君摩挲君試看劍歌有曲君莫彈從
來烈士皆如此茫茫萬古悲風寒

騶虞歌

玉壺漏咽銅龍曉香煖蓬萊百花繞閭闔平臨寶仗催
千官跪進騶虞表慶世騶虞此日生普天率土頌昇平
般般文采樂君囿濟濟威儀叶聖徵周詩自昔歌忠厚
此物由來世稀有五龍八駿詎能追紫鳳祥麟本同友

南薰方理朱絲絃
菟昌懸精光麗天
瑤編綵毫瑞青史
吁嗟騶虞古無比

東湖春意圖為樵門李桃生題

鴛鴦湖上春風軟
柳絲無力桃痕淺
暖烟籠碧水如雲
纖纖細草苔香滿
滿樓畫大堤傍羅綺
晴嬌綠錦鄉
冰絃玉柱新調呂
半蹙雙蛾倚淡粧
鵲鵲雙雙點晴霧
百勞東飛燕西去
紫泥誰染天上春
雲絨留得相思句
日暮相思枉斷腸
綠波千里共悠揚
龜甲屏風花夢曉

一抹修蛾鏡中小

王芾家詠梅花燈

并娥剪素鏤秋水蘭燄傳春破
瑤藍粉屏射蠟搖珠光的歷冰
魂廣寒裡嚴城畫角聲咿咿義
馭漸軋搏桑枝芳心暗逐烟燼
落玉鳬味冷沉烟薄

紫芝山房歌為鄭尚書賦

我昔慕幽賞山水縱奇觀朝揮
海客棹暮宿山霞闕武夷羣峰
白雲端幔亭玉女非人間層巒
疊嶂去何極空

際軒翥如騰鸞雙溪夾出繞明鏡百步九折鳴飛湍就
中紫芝一峰峭恍惚溪上凝烟鬟深林瑤草晝可拾山
人笙鶴無時閒紫芝之山不可攀須知聖世非商顏祇
應吐祥產奇瑞煌煌三秀被林巒何人卜居此山下康
成子孫世文雅朶朶芙蓉鏡底青淙淙瀑布屏間瀉山
寂寂分山房幽蘭膏烟帳夜埋頭經史縱橫一萬卷天
地上下三千秋閒尋方外屐笑掬澗底流採芳結瑤佩
濯足歌遠遊蒼生海內望安石謝公不得東山留一朝

東書謝丘壑嘯咤風雷起寥廓石牀松月為誰明清夜
徒聞弔猿鶴南宮作賦安足竒大廷對策裨袞衣才高
萬乘屢回顧承明出入生光輝玉驄曾錫天間騎節鉞
重煩大藩寄小吏蘭臺識馬周居人渤海懷龔遂勝槩
相看無處無烟蘿不似故園居瞻雲幾動親闈念歸思
空因託鯉魚爾來中朝屬耆舊廊廟端嚴躋章綬廷尉
人傳天下平秩宗名在當時右當時之名信可稱回望
故山山更青晉公綠野久寂寞白傅匡廬未足榮祇

今八荒歌太平三台位列中天明功成早晚拂衣去仙
舟九曲能相迎此時君當倒却建溪綠我亦為君歌一
曲何必相携茹紫芝四海清風緬高躅

雙桂堂為彭進士汝器賦

君家庭前雙桂枝翠芳金粟枝離離塵世豈同凡木比
雲間自有天香吹人言此種蟾宮得曾映清光滿仙陌
移植君家今幾年日日開簾玩芳色請看雙桂共青青
五柳三槐漫獨榮月中鸞鳳交加影風裏虬龍答和聲

更愛君家好兄弟
早歲香名折仙桂
君不見庭前此
樹根不移直上
凌雲日相對

薜蘿山房歌為新寧王錫賦

陶公柳莊蕭索久
蔣生竹逕開何有
何似君家隱處偏
開門蘿薜向人懸
蘿薜蒼蒼送晚涼
縈烟絡月繞林塘
鳥啼密葉籠書幌
客去飛花滿石牀
寒侵細蔓秋仍薄
飲覆春泉香濯濯
夜深惟恐蛟龍爭
幽處無論鬼神託
我憶山房昔訪君
繁烟裊裊更紛紛
別後山衣夢中冷

何日重紉羅薜雲林間
泉石題名久澗畔莓苔
藉醉頻
緘藤為報故人意
瑤琴一曲山房春

凌歊臺懷古

臺在黃山巔宋太祖離宮

朝發石頭渚暮宿黃山道
携酒眺古臺離離但烟草
憶昔茲臺何壯哉
宋祖離宮臺上開
臺前寶樹入層漢
臺下炎歊隘九垓
楚山望盡蜀山出
雄跨全吳勢凌突
欲吞銅雀俯中原
不數黃金貴
竒骨三千歌舞宿
雲端公
子王孫往復還
秦關捷書不再返
鼎湖飛龍誰復攀
繁


華一旦乃如此寂寂荒臺秋色裡往事徒悲未黍場殘
碑半墮滄江水滄江水流去不回空陵劫火變寒灰欲
將霸業問行客黃山落日清猿哀

蒼梧與鄒郎中別

五兩絳飛雨夜宿蒼梧陰蒼梧烟水正愁絕江上誰歌
離別吟與爾別離何草草百壺且盡開懷抱霜鱗紅鱗
入座鮮錦荔堆盤出林早醉起長歌一慨然客中況是
客中憐明朝海上能相憶只有青天片月懸

藤江別思為徐枝文題

秋風泛鷁凌寒渚繞座鳴鷗促飛雨羽觴爭勸不須停
醉發蒼梧下湓浦三年絳帳淑青衿此日臨岐識爾心
為問藤江汪汪水別意與之誰淺深



虛舟集卷三